



## Line

Line，我一直認為是一日食飽閒仙仙的人，佇遐咧做議量、解心悶的。當然這種想法是我家己的誤解恰淺見，真正是對不住設計這款物件的斲人。

對 line 產生敬佩，是阮一个同學去致著歹物仔，真艱苦咧治療。阮遮的同學，無法度從南走北來共款勸。有一个真綴會著時行的同學叫阮用 line，規陣同學就真方便佇網路頂逐日 line 來 line 去。有人講笑談，有人聽伊講治療的折磨，阮這個同學就有精神上的寄託，閣因為伊也真儼硬、真巴結，身體就漸漸恢復，度過伊人生當中上艱難的劫數。

逐家退休了後，「line」這個媒人婆仔，閣較無閒。便若有人喝講欲迢迢，就有人安排行程、收集資料，逐家就做陣去遊山玩水。綴無著陣嘛無要緊，定著有人真體貼，會共旅途的光景、好食物翕落來，囤起去「line」。予佇厝裡的同學嘛靠「line」，綴人遊一四界。

家家戶戶都有喙舌相咬的時，新婦大家若咧袂對同，心肝內的鬱卒就佇「line」故放出來，姊妹仔伴我一句、你一句，隨時就船過水無痕矣。毋但按呢，親像烏心油的事件，阮真緊就佇「line」懸頂知影啥品牌的物件袂食得。有一站仔，逐家咧痞做「果子醋」，有人做菝仔、有人做龍眼、火龍果、弓蕉.....，因為「line」予逐家愈做愈心適、愈做愈趣味。物件做做咧，聚會的時就提出來展。有一位同學個翁婿過身去，悲傷甲致著憂鬱症，幾若年來，攏行袂出門。因為使用「line」，這陣阮若咧聚會，伊毋但會參加，閣會攢手路菜來恰逐家鬥鬧熱。

看到遮，恁一定想講阮這陣同學干焦愛耍愛食爾爾，其實毋通共阮看甲遮無出脫。阮的同學有人是「夜婆」專家，三不五時就將伊所翕夜婆的相片共逐家紹介；嘛有人真勢插花，三不五時就會共一盆一盆嬌噹噹的花樣翕落來予逐家欣賞；嘛有人布揸仔做了真雅氣、菜種了真鮮沢.....。因為「line」，予阮知影阮這陣同學逐家攏過了袂耪、真幸福。上重要的是因為「line」，予阮遮的同學，毋管東西南北、本島抑是離島，攏連結做伙，歡喜的時陣，做伙喝咻；悲傷的時陣，同齊流目屎。

歲頭食到遮，閣有遮濟同學來相侑、相榷，互相關心、真情相疼，真正是愛感謝「line」，共阮這陣純真的同學之情，牽甲遮爾感心、遮爾久長。

作者：陳昭蓉

### ☆詞彙學習☆

【閒仙仙】îng-sian-sian：形容人閒著沒事幹。

【做議量】tsò-gī-niū/tsuè-gī-niū：消遣、排遣。排解愁悶、消磨時間。

【斲人】gâu-lâng：能人、賢人。有才能、品德高尚的人。

【款勸】khuán-khng：苦勸。殷勤款款的勸告。

【儼硬】giám-ngê/giám-ngī：堅強。

【巴結】pa-kiat：上進努力，堅強不示弱。

【對同】tuì-tâng：吻合、恰當。

【雅氣】ngá-khì：氣質文雅、高尚。

【鮮沢】tshinn-tshioh：新鮮有光澤。指魚肉菜等食物新鮮有光澤的樣子。

【相榷】sio-kīng：互相支持、幫忙。